

ՀԱՂՈՐԴՈՒՄՆԵՐ

Հ. Ստեփանյան

ՄԻՔԱՅԵԼ ՆԱԼԲԱՆԴՅԱՆԻ ՈՒՂԵՎՈՐՈՒԹՅՈՒՆՆԵՐԸ

Միքայել Նալբանդյանի ուղևորությունները ներկայացնում են խոշոր հետաքրքրություն և արժանի են մեծ ուշադրության:

Միքայել Նալբանդյանի մի շարք ուղևորությունները, որոնք ընդգրկել են շուրջ 14 տարի (1848—1862 թթ.), դուրիս պատկերացնելու համար կարելի է պայմանական կերպով ստորաբաժանել մի քանի խմբավորումների. 1) 1848 թ. մինչև 1853 թ. Մ. Նալբանդյանը 19 տարեկան հասակից ուղևորություններ է կատարել Ռուսաստանի հարավում, 2) 1853 թ. մինչև 1859 թ. ընդգրկում է Ռուսաստանի գլխավոր կենտրոնները, 3) 1859 թ. մարտ ամսի վերջերից մինչև նույն թվականի հուլիսի կեսը, հազիվ չորս ամիս տևողությամբ. այդ ժամանակ Նալբանդյանը կատարել է իր առաջին ուղևորությունը արտասահման, դեպի Արևմտյան Եվրոպա և վերադարձը Ռուսաստան: 4) 1860 թ. հունիսի կեսից մինչև նույն թվականի նոյեմբերի կեսը, ընդգրկում է մի ժամանակաշրջան, երբ Նալբանդյանը Հնդկաստան գնալու կապակցությամբ ուղևորություն է կատարել դեպի Կովկաս և Հայաստան: 5) 1860 թ. նոյեմբերի կեսից մինչև 1862 թ. մայիսի վերջը, մոտավորապես մեկ տարի 7 ամիս տևողությամբ, երբ Նալբանդյանը կատարել է ուղևորություն դեպի Հնդկաստան, ինչպես և երկրորդ ու երրորդ ուղևորությունները դեպի Արևմտյան Եվրոպա (և վերադարձը Պետերբուրգ): 6) 1862 թ. հունիսի վերջերից մինչև նույն թվականի հուլիսի կեսը Նալբանդյանը Պետերբուրգից ուղևորություն է կատարել Նոր-Նախիջևան, որտեղ ձերբակալվել է և բանտարկության ուղարկվել:

Նախքան Միքայել Նալբանդյանի բուն ուղևորություններին դիմելը, հարկ ենք համարում նշել հետևյալը՝ չպետք է մոռացության տրվի, որ պատանի Միքայելը, սեր ունենալով դեպի բնությունը, իր մանկության տարիներում այցելել, դիտել է իր ծննդավայր Նոր-Նախիջևանին մոտիկ մի շարք վայրեր՝ Ռոստով խոշոր քաղաքը, Դոն գետի ստորին հոսանքի ափերը, նաև Նոր-Նախիջևանի շրջակայքի հայկական մի քանի գյուղեր. այսինքն կատարել է տեղական հայրենագիտական կամ զավառագիտական բնույթի ուղևորություններ:

Նալբանդյանի բուն ուղևորությունները սկսվել են 1848 թ. հուլիս ամսից. այդ ժամանակ նա աշխատել է Նոր-Նախիջևանի և Բեսարաբիայի թեմական առաջնորդարանում որպես քարտուղար: Քանի որ թեմը ընդգրկում էր մի ընդարձակ տերիտորիա, որի ծայրամասերն էին՝ արևելքում Նոր-Նախիջևանը (Դոնի ստորին հովիտում) և արևմուտքում Քիչինև քաղաքը (Բեսարաբիայում, այժմյան Մոլդավական ՍՍՌ), ուստի և Նալբանդյանի ուղևորությունները ընդգրկում են Ռուսաստանի (և Ուկրաինայի) հարավային մասերը, Սև Ծովի առափնյա տարածությունները:

¹ Այս հաղորդումը կազմելիս հիմնականում օգտվել ենք Ա. Ինճիկյանի «Միքայել Նալբանդյանի կյանքի և գործունեության տարեգրությունը» աշխատությունից:

Այդ ժամանակամիջոցում Նալբանդյանը շատ անգամ է եղել Քիշինևում և Նոր-Նախիջևանում, մի քանի անգամ՝ Օդեսայում, մեկ անգամ՝ Խերսոնում. իսկ Ղրիմի քաղաքներից՝ մի քանի անգամ Թեոդոսիայում և Սիմֆերոպոլում:

1853 թ. հունիսի սկզբներին, երբ Մ. Նալբանդյանը եկել է Քիշինևից Նոր-Նախիջևան Գաբր. Պատկանյանի մոտ, կառքով շտապ մեկնել է Քիշինև ոստիկանական հետապնդումներից ազատվելու համար: Քիշինև հասնելուց հայտնել է իշխանություններին. թե իբր գնալու է Իզմայիլ քաղաքը, սակայն նա իրոք մեկնել է Մոսկվա:

Մոսկվայում սկսվել է նրա ուղևորությունների նոր ժամանակաշրջանը (2-րդը), որը 1853 թ. հուլիսից տևել է մինչև 1859 թ. մարտ ամիսը: Ապրելով Մոսկվայում, Նալբանդյանը մի քանի անգամ եղել է Պետերբուրգում: Մոսկվայից Պետերբուրգ և Պետերբուրգից Մոսկվա ուղևորվել է միշտ երկաթուղով¹: Առաջին անգամ այցելել է Պետերբուրգը 1853 թ. և մնացել է այնտեղ երկու ամիս: Այնուհետև 1856 թ. մեկնել է Մոսկվայից Պետերբուրգ «Հյուսիս-սափայլ» ամսագրի համար մայր տառեր ձեռք բերելու նպատակով և մնացել է այնտեղ ավելի քան երկու շաբաթ: 1859 թ. Նալբանդյանը կրկին ուղևորվել է Մոսկվայից Պետերբուրգ և կրկին մնացել է այնտեղ մոտ երկու շաբաթ՝ քննչական մարմիններին բացատրություններ տալու «Հյուսիսսափայլում» տպագրված իր ընդդիմադիր հոդվածների և ազատատենչ բանաստեղծությունների համար: Այդ կապակցությամբ որոշում է մեկնել արտասահման: Մինչ այդ, Նալբանդյանը, որ գիտեր դիտել և գնահատել բնության գեղեցկությունը, մի քանի անգամ եղել էր Մերձմոսկովյան անտառաշատ ամառանոցներում, Շերեմետևի գյուղում և այլուր:

Արտասահմանում սկսվում է Նալբանդյանի ուղևորությունների երրորդ ժամանակաշրջանը: Արտասահմանում մոտ 4 ամսվա ընթացքում Նալբանդյանը եղել է մի շարք քաղաքներում. հիմնականում ապրել է Փարիզում, այցելել է Բեռլինը, եղել է Լոնդոնում, որտեղ մնացել է 1 ամիս: Այդ ժամանակամիջոցում Նալբանդյանը այցելել է նաև Բրյուսելը (Բելգիայում), Գերմանիայի այլ քաղաքներն ու բուժավայրերը՝ էմսը, էսսենը, Զոդենը, Մայնի Ֆրանկֆուրտը և այլն. հավանաբար նաև Վիեննան ու Մարիենբադը Ավստրիայում:

1859 թ. սեպտեմբերին Նալբանդյանը Փարիզից Վարշավայով վերադարձել է Ռուսաստան: Այդ ժամանակ սկսվել է Նալբանդյանի ուղևորությունների մի նոր էջը (չորրորդ ժամանակաշրջանը):

Արտասահմանում Նալբանդյանը տեղեկացել էր, որ հնդկահայերը խոշոր ժառանգություններ են թողել Նոր-Նախիջևանի համար: Նա գրել է՝ «Նպաստած կլինենք, որ մի նշանավոր գումար օտար պետությունից՝ Անգլիայից փոխադրվի Ռուսաստան՝ Նոր-Նախիջևան»:

1860 թ. հունիսի 15-ին Նալբանդյանը մեկնել է Պետերբուրգից Մոսկվա, ապա Նոր-Նախիջևան, ուր և տեղական հայ համայնքի կողմից պատվիրակ է ընտրվել Հնդկաստան գնալու համար:

Ուղևորության վարչական և պաշտոնական հարցերը լուծելու համար Մ. Նալբանդյանը 1860 թ. օգոստոս ամսին Նոր-Նախիջևանից մեկնել է Թիֆլիս, որտեղ մնալով մեկ շաբաթ, Կովկասի փոխարքայի դիվանատնից ստացել է

¹ Պետերբուրգ—Մոսկվա երկաթուղին առաջինն է եղել Ռուսաստանում և կառուցվել է 1839 թ.:

անհրաժեշտ անցագիրը. այնուհետև նույն թվականի սեպտեմբերի սկզբին Թիֆլիսից լոռվա սարահարթի վրայով՝ մեկնել է էջմիածին, որտեղ մոտ մի ամիս մնալուց հետո, ստացել է երեսփոխանական թուղթը։ Այդ ժամանակամիջոցում նալբանդյանը այցելել է Օշականը, Քանաքեռը, դիտել է Արարատյան դաշտի բնությունը, ի միջի այլոց ճիշտ դիտողություններ է արել Երևանի քամու մասին։ 1860 թ. հոկտեմբերի 15-ին նալբանդյանը մեկնել է էջմիածնից Երևան, ապա Թիֆլիս. նոյեմբերի 1-ին Թիֆլիսից Փոթի։ Վերջապես 1860 թ. նոյեմբերի 13-ին Մ. նալբանդյանը Փոթիի նավահանգստից ճանապարհվել է դեպի Հնդկաստան։

1860 թ. նոյեմբերի 14-ին նալբանդյանը շոգենավով հասել է Բաթում². այնուհետև, Տրապիզոնում կանգ առնելուց հետո, Բոսֆորի նեղուցով հասել է Կ. Պոլիս նոյեմբերի 20-ին։ Կ. Պոլսում մեկ ամիս մնալով, նալբանդյանը մասնակցել է Պոլսի հայ հասարակական կյանքին։ Իր պատվիրակության նպատակը գլուխ բերելու համար չի մեկնել Պոլսից ուղղակի Հնդկաստան, այլ իր ուղևորության մարշրուտը դարձրել է դեպի Արևմտյան Եվրոպա, պարզելու գործը լոնդոնում անդլիական իշխանության հետ։ Ուստի 1860 թ. դեկտեմբերի 21-ին նալբանդյանը, օգտվելով այդ առիթից, հասարակական գործերի համար նորից գնացել է Արևմտյան Եվրոպա. շոգենավով նա մեկնել է դեպի Ֆրանսիայի նավահանգիստ Մարսելը. ճանապարհին Միջերկրական ծովում պատահած խիստ փոթորկի պատճառով, շոգենավը ստիպված կանգ է առել Սիցիլիա կղզու Մեսինա նավահանգստում, որտեղ նալբանդյանը հանդիպել է Իտալիայի ազգային հերոս Գարիբալդիի բանակայիններին. նալբանդյանը Մեսինայից մեկնել է Նեապոլ նավահանգիստը, այդտեղից էլ այցելել Հռոմը (դեկտ. 31-ին)։

1861 թ. հունվարի 3-ին նալբանդյանը Նեապոլից նավով մեկնել է Ջենովա։ Այդտեղից երկաթուղով հասել է Ալպյան ձյունածածկ լեռների ստորոտը։ Տուրին քաղաքից Ալպերի բարձրագույն դժվարանցանքների լեռնանցքներով, մերթ ժմերդան, մերթ սահնակով, մեծ նեղություններով մուտք է գործել Ֆրանսիա. այնուհետև կրկին երկաթուղով՝ Լիոն և Փարիզ, ապա լոնդոն, որտեղ հազիվ 1861 թ. փետրվարի 22-ին անգլիական արտաքին գործերի ատյանը հաստատել է նալբանդյանի պատվիրակության վկայականը։ Այդպիսով նալբանդյանը լոնդոնում մնացել է մինչև մարտի վերջը, սպասելով ձմռան վերջանալուն։ Այդ ժամանակամիջոցում մեկնել է Փարիզ, լույս ընծայելու իր հռչակավոր «Երկու տողը»։ Փարիզում նալբանդյանը փորձել է պատվիրելու 1.500 օրինակ Փոքր Ասիայի մեծագիր (78×160 սմ) քարտեզը, սակայն գլուխ չի եկել։ Այդ ժամանակ նալբանդյանը երեք անգամ այցելել է Փարիզը։

Վերջապես 1861 թ. ապրիլի 19-ին նալբանդյանը Փարիզից մեկնել է. ուղևորվելով այս անգամ արդեն դեպի Հնդկաստան։ Երկաթուղով հասել է Մարսել, այդտեղից էլ նավով Միջերկրական ծովով՝ Ալեքսանդրիա նավահանգիստը Եգիպտոսում։ Քանի որ Սուեզի ջրանցքը դեռևս չէր կառուցվել³, նալբանդյանը ցամաքային ճանապարհով Կահիրեյով Սուեզ է հասել մայիսի սկզբին։

¹ Այլ ոչ Դեբեդի ձորով, քանի որ մինչև երկաթուղի կառուցելը այդ ձորով ոչ մի ճանապարհ չի եղել։

² Բաթումը այդ ժամանակ Թյուրքիայի սահմաններում էր։

³ Սուեզի ջրանցքի օդատարածումը սկսվել է 1869 թ. նոյեմբեր ամսից։

Այնուհետև մայիսի 13-ին հասել է Ադեն, մայիսի 22-ին Ցեյլոն, իսկ 27-ին՝ Մադրաս քաղաքը. այսինքն՝ Սուեզից Մադրաս ծովային տարածությունը շոգենավով անցել է 21 օրում: Ի վերջո հունիսի 1-ին (հին տոմարով) հասել է Կալկաթա, Նալբանդյանը Կալկաթայում մնացել է մինչև նույն թվականի սեպտեմբերի 27-ը, համարյա չորս ամիս:

1861 թ. սեպտեմբերի 27-ին Մ. Նալբանդյանը, հաջող ավարտելով հնդկահայերի՝ Նոր-Նախիջևանին կտակած գումարների հարցը, մեկնել է Կալկաթայից¹, 11 օրից հետո, հոկտեմբերի 8-ին հասել է Մադրաս նախահանգիստը: Վերադարձի մասին օրացույցային տվյալները խախտված են. այնպես է ստացվում, իբր Նալբանդյանը Մադրասում մնալով մինչև հոկտեմբերի 23-ը, նույն ամսի 24-ին, այսինքն մեկ օրում հասել է Սուեզ, մի բան, որը կատարելապես անհնարին է: Եթե Նալբանդյանը Կալկաթա գնալուց Սուեզից Մադրաս ծովային տարածությունը նավով անցել է 21 օրում, ապա վերադարձին նույն տարածությունը պետք է անցներ մոտավորապես նույնքան ժամանակում: Ուրեմն, Նալբանդյանը ոչ թե Մադրասում է մնացել 15 օր, այլ այդ ժամանակամիջոցում եղել է ծովային ուղևորության մեջ, Սուեզ վերադառնալու ժամանակ: Այնուհետև Նալբանդյանը մեկնել է հոկտեմբերի 27-ին Կահիրեից, 28-ին հասել է Ալեքսանդրիա. այդտեղից ծովով Միջերկրականի արևելյան ափերով Ալեքսանդրիայից Յաֆֆա և Ալեքսանդրետ գնալուց, 4—5 օրով անցել է Նրուսադեմ: Շարունակելով ուղին, Ալեքսանդրետից մեկնել է Իզմիր և այնտեղից շոգենավով դեկտեմբերի 1-ին հասել է Պոլիս: 27 օր Պոլսում մնալուց հետո, Նալբանդյանը գրական և հասարակական-ուղևուցիոն գործերով մեկնել է կրկին Արևմտյան Եվրոպա: Այդ եղել է Նալբանդյանի երրորդ ուղևորությունը Արևմտյան Եվրոպա (ուր նա գնացել էր թե՛ մինչև Հնդկաստան մեկնելը և թե՛ Հնդկաստանից Ռուսաստան վերադառնալուց առաջ): Պոլսից մեկնելուց հետո, 7 օրվա ընթացքում, հունվարի 2-ին Նալբանդյանը հասել է Մարսել, ապա Փարիզ: Նույն ամսի 8-ին մեկնել է Փարիզից և Կալէյով մեկ օրում, ամսի 9-ին հասել է Լոնդոն: Մնալով Լոնդոնում մեկ ամսից ավելի, Նալբանդյանը երկու շաբաթով կրկին այցելել է Փարիզը: Վերադարձին Լոնդոնում Նալբանդյանը մնացել է 40 օր և մի քանի կարևոր տեսակցություններ է ունեցել Ա. Գերցենի, Ն. Օգարյովի և Լոնդոնի մյուս ռուս ուղևուցիոն էմիգրանտների հետ:

Նալբանդյանը 1862 թ. ապրիլի 4-ին Լոնդոնից ճանապարհվել է Փարիզ, որտեղ մնալով մինչև մայիսի 25-ը, լույս է ընծուել իր հեղինակված խոշոր աշխատությունը՝ «Երկրագործությունը որպես ուղիղ ճանապարհ»: Նալբանդյանը 1862 թ. մայիսի վերջերին Փարիզից Բեռլինի և Վարշավայի ուղղությամբ վերադարձել է Պետերբուրգ և այդպիսով ավարտել իր երկարատև, հեռավոր և հետաքրքիր ճանապարհորդությունը:

Արտասահմանից Ռուսաստան վերադառնալուց հետո սկսվել է Նալբանդյանի ուղևորությունների վերջին փուլը: Պետերբուրգում նա մնացել է մեկ ամիս՝ 1862 թ. մայիսի 25-ից մինչև հունիսի 25-ը: Նալբանդյանը որոշել է մեկնել Նոր-Նախիջևան և այնտեղի հասարակությանը հաղորդել դեպի Հնդկաստան կատարած իր ուղևորության՝ պատվիրակության դրական արդյունք-

¹ Մ. Նալբանդյանը Հնդկաստանից մի ուղեգրությամբ է նվեր ուղարկել Մոսկվայի Կենդանաբանական այգու համար (Ռ. Գաբիլիլան, Ռուս ստաջագետ և Ռուսիայի Մ. Նալբանդյանը. Հեռակա Մանկավարժական ինստիտուտի դիտ. աշխատությունները ժողովածու, № 1, Նրևան, 1953):

ները: Մինչ այդ, Նալբանդյանը հայտարարություն է տվել Հայաստանի պատմական քարտեզի տպագրության, բնութի և բաժանորդագրության պայմանների մասին. սակայն այդ ուշագրավ նախաձեռնությունը անկատար է մնացել: Հունիսի 25-ին Նալբանդյանը Պետերբուրգից մեկնել է Մոսկվա, այդտեղից էլ անցել է Նոր-Նախիջևան, ողտեղ նրան ջերմորեն դիմավորել է տեղական հայ հասարակությունը: Բայց 1862 թ. հուլիսի 14-ին Նալբանդյանը ձերբակալվել է. նախ փոխադրվել է Եկատերինոսլավ քաղաքի (այժմյան Դնեպրոպետրովսկը Ուկրաինայում) բանտը, այնտեղից Մոսկվա և ապա Պետերբուրգ, որտեղ բանտարկվել է Պետրոպավլովսկի բերդում:

Նալբանդյանը Պետրոպավլովսկի բերդում մնացել է մինչև 1865 թ. մայիսի 13-ը, երբ աքսորվել է Կամիշին խուլ քաղաքը (Վոլգա գետի միջին հոսանքի աջ ափին): Հյուծված վիճակում Նալբանդյանը նոյեմբերի վերջերին փոխադրվել է Պետերբուրգից Մոսկվա—Րյազան—Տամբով քաղաքների ուղղությամբ դեպի իր աքսորավայր Կամիշինը, որտեղ 4 ամիս մնալուց հետո հայ ժողովրդի մեծ զավակը մահացել է 1866 թ. մարտի 31-ին:

Ամփոփելով, պետք է ասել, որ Մ. Նալբանդյանը իր բոլոր ուղևորությունների ժամանակ եղել է երեք աշխարհամասերի՝ Եվրոպայի, Ասիայի, Աֆրիկայի այն ժամանակվա տասնյակ պետություններում և երկրներում՝ Ռուսաստանում, Լեհաստանում, Գերմանիայում, Ֆրանսիայում, Անգլիայում, Իտալիայում, Ավստրո-Հունգարիայում, Թյուրքիայում, Եգիպտոսում, Արաբիայում, Հնդկաստանում, Յեյլոնում և այլն. այցելել է ավելի քան 50 խոշոր և հայտնի քաղաքներ, որոնցից 20-ը նավահանգիստներ են: Հիշած քաղաքներից ութը հիմնական հանգուցային վայրեր են և առավել նշանավոր են Մ. Նալբանդյանի կյանքում. դրանք են՝

— Նոր-Նախիջևանը (Ռոստովի հետ), Քիշինևը, Մոսկվան և Պետերբուրգը Ռուսաստանում.

— Փարիզն ու Լոնդոնը Արևմտյան Եվրոպայում.

— Կ. Պոլիսն ու Կալկաթան Ասիայում:

Նալբանդյանը շոգենավով ուղևորություններ է կատարել Ատլանտյան և Հնդկական օվկիանոսներում, Սև, Մարմարա, Էգեյան, Տիրենյան, Միջերկրական, Կարմիր, Արաբական ծովերում, Բենգալյան ծոցում. անցել է Լա-Մանշի և Պա-դե-Կալենյի, Բոսֆորի և Դարդանելի, Մեսինայի, Բաբ-ել-Մանգեբի և Փոլքի նեղուցներով:

14 տարվա ընթացքում Մ. Նալբանդյանն իր կատարած բազմաթիվ ուղևորությունների ժամանակ անցել է մոտավոր հաշվով ավելի քան 45 հազար կիլոմետր տարածություն, որից մոտավորապես 25 հազարը ծովով, այսինքն՝ մի ուղի, որը երկրագնդի հասարակածից էլ շատ ավելի է: Այդպիսով Մ. Նալբանդյանը կարող է համարվել 19-րդ դարի հայ խոշոր ճանապարհորդ:

Միքայել Նալբանդյանի բազմապիսի ստեղծագործությունները, հարուստ գրական ժառանգությունը և հետաքրքիր ուղևորությունները ուսումնասիրության նյութ են տալիս ոչ միայն լեզվաբաններին, գրականագետներին, պատմաբաններին, փիլիսոփաներին, տնտեսագետներին, այլև աշխարհագետներին: